

全華叢書

詩律武庫後集目錄

卷一

酒飲門

以醉爲鄉

白墮春醪

麴生風味

濁酒一杯

忍斷杯中物

中山千日酒

鬲上臍下

典衣償酒債

一飲一石

玉山頽

願爲十日飲

騎馬如乘船

枕麴藉糟

浮以大白

耽酒無錢

酒兵

送客

酒中聖賢

詩酒仙

金貂換酒

杖頭錢

黃雞白日

盜飲

盃酌餘瀝

瑞露甘香

卷二

酒飲門

杯中弩影

步兵校尉

黃公酒壚

無事飲

醉鄉侯

三爵

醕酎九醞

堯飲千鍾

以驅俗態

拍浮酒船

桑落河酒

淵明攢眉

惡客

日飲毋何

倒著接離

酒客法士

公在壑谷

藍尾

漉巾

獨酌

醉面

酒家仙

卷三

儉約門

爛蒸瓠壺

拙於生事

數米而炊

得米如珠

家具少於車

一錢看囊

方冬猶葛衣

腰垂破銀章

坐以破馬鞵

牆頭度酒

庾郎食韭

清畏人知

貧猶有一劍

名譽門

大小馮君

康成書帶

玉人

紫髯將軍

峴山

濯濯如春柳

束之高閣

人門兼美

皮裏陽秋

韋趙杞梓

東南之美

墓題征西

戶外之屨

水鏡

鶴在雞羣

角立傑出

卷四

才能門

痛飲讀離騷

瑶林瓊樹

望郎

去天尺五

屈公望此府

行祕書

魏公畫籌

檣櫟散材

技癢欲言

識鑿門

卿家癡叔

其類似堯

平生馬少遊

不如一縫掖

目擊道存

半面之雅

銅駝荆棘中

弊箒千金

相去九牛毛

掩口盧胡

烹瓠葉

阿奴碌碌

造物拘拘

通德擁髻

絳帕蒙頭

卷五

識鑿門

白屋非久留

軒冕儻來

臧穀均亡羊

何詎不爲福

折衝樽俎

鹽車遭伯樂

作駒已權奇

溝中枯木

恩德門

直指一困

祭竈請比鄰

痿人念起

分我餘光

贖老馬

雞犬識新豐

助給薪水

陰德畏人知

治獄多陰德

案法平允

陰施陽報

書畫門

咄咄逼人

臨池盡墨

厭家雞愛野鶩

春蚓秋蛇

柳家元和腳

卷六

書畫門

羣鴻戲海

一臺二妙

宛若銀鈎

妙畫通靈

裴楷三毛

宜置岳壑中

正在阿堵中

二龍飛去

奏樂圖

此君墨君

通神佳手

名下無虛

咫尺萬里

畫魚得獺

雌雄龍

雲漢北風圖

天皇寺仲尼像

畫龍作雨

技藝門

懷中方書

疾在腠理

仙方出龍宮

身事問潁陽

紫金丹

燕頷虎頭

屠龍之技

伏犀貫枕

相在怒中

折臂三公

夢吞三畫

書板索金

門前水西流

卷七

寶器門

歐冶五劍

劍有雌雄

干將鏃劔

步光

修月斧

朱絲繩玉壺冰

玉燕釵

玉有辟邪香

補天石

支機石

支牀龜

珍產門

追風月題

乘黃

龍文虎脊

穆王八駿

德宗二馬

九花虬

汗血

卷八

決雲兒

青田鶴

鳳將九雛

倒挂子

冰蠶

長腰米

青精飯

貢茶十品

紅藥

合浦珠還

靈異門

君子化猿鶴

蛇蟠鏡中

庭松西指

囊中畫像

啖棗悟前生

俗緣勿相近

老人青藜杖

天津老人

白鹿當道

卷九

靈異門

花月之妖

卓錫飛鶴

深根固蒂

烏府

沙苑飛鶴

穴蟻難逃

燃犀見水族

樹化青牛

花木之妖

燭妖

卿雲

佳氣鬱葱

南柯夢

邯鄲枕

遊仙枕

精魂為芝

王喬玉棺

胡廣托姓

鴻漸卜姓

天地劫灰

韓湘染花

左慈拄杖

颶風

三耳秀才

作勞耳鳴

卷十

雷雨門 祈雨附

阿香推雷車

借霹靂車

馬上天瓢

隨車雨

御史雨

葬骸澍雨

段文昌

自暴祈雨

瑞雷

鞭石

崖山

鄧國張公

房玄齡

蜥蜴

鏡鼻龍

玉龍子

甲子雨

李清臣

蘇子瞻

作霖雨

卷十一

佳人門

邢尹二夫人

時世粧

細馬駝吳姬

獺髓醫玉頰

解語花

林下風氣

駿馬換傾城

唾碧成花

金釵十二行

莫惜金縷衣

玉纖纖

傾城

墨池雪嶺

脈溫腸已斷

溫柔鄉

不如倚市門

人璫

夢龍據胸

號國夫人

海棠花睡

白髮青裙

卷十二

曠達門

拄笏望西山

平生無長物

支離其形

徐公通介

眼前無俗物

蛙鳴當鼓吹

鵬鷄均一適

造化小兒

幼輿折齒

麻姑送酒

南面王樂

頭脂足垢

乞食歌姬院

陶潛乘籃輿

方外司馬

柳生左肘

我醉欲眠

瓠落無所容

心無天遊

漁童樵青

嚴陵瀨

卷十三

感慨門

短髮不勝簪

日月不相饒

過客逆旅

太白配殘月

宋玉賦招魂

思舊因鄰笛

丹塗一布衣

杜牧來遲

沈郎清瘦

雍門琴

劉郎再來

黃鵠歸故鄉

牛斗不神

望洋而嘆

憂患萬端

擊唾壺

傾河注海

不忘故物

老牛舐犢

望雲哭友

蒲柳之質

人生如寄

姓名為鬼錄

歲在龍蛇

歸然如魯靈光

毅豹均死

不過西州門

羈旅

卷十四

感慨門

莊舄思越

海變桑田

扣角而歌

麥秀之歌

幾居其半

膏火相煎

紅顏一春樹

半死心

我輩情鍾

桑榆無遠照

秋燕如客

窮猿失木

拚伊之鬚

警懼門

驪龍之珠

杞國天崩

見月而喘

睡觸屏風

鼓角鳴地中

心膽破裂

髀裏肉生

千里井

橫破口語

人馬辟易

肉瘦怯豺狼

險劇褒斜

傳舍

引錐刺舌

卷十五

賢豪門

文武兼備

桓温有客

緩急扣門

張公江海客

啖公八百里

豪氣不除

古人中求

山澤驪仙

舌耕

萬頃陂

捫蝨而對

河西三明

一坐盡傾

鄭公鄉

窮愁著書

濁世佳公子

咄嗟而辨

德公上冢

數百萬一擲

不辨袁彥道

龍章鳳姿

老子猶龍

魯國真男子

才疎意廣

鼻息雷鳴

亶亶逼人

梁公拜床下

床下拜龐公

富貴取功名

怒髮衝冠

白虹貫日

一言取宰相

詩律武庫後集卷一

宋呂祖謙撰

郡後學胡鳳丹月樵校梓

酒飲門

以醉爲鄉

唐王績字無功自號東臯子乘牛車經酒肆留飲或
數日嘗采杜康儀狄以來善酒者爲譜李淳風曰君
酒家南董也所居東南有盤石乃立杜康祠尊爲師
以焦華配作醉鄉記以擬劉伶酒德頌故坡詩有老
來專以醉爲鄉之句因醉鄉記而言耳

白墮春醪

張君房脞說海東劉白墮善釀酒曝於日中經旬酒
味不動飲之者醉而不醒永熙中青州毛鴻賓齋酒
之番路逢劫盜飲之卽醉皆被擒因號爲擒姦酒故
當時遊俠語曰不畏張弓拔刀惟畏白墮春醪東坡
次趙德麟餉酒詩云偶逢白墮爭春手遣入王孫玉
斝飛是也

麴生風味

鄭棨開元傳信記云葉法善有道術一日與朝士數

人會之真觀忽有人叩門自稱麴生未及延接已突
入年少秀美語言不凡葉疑其非人潛飛小劍擊之
應手墮地乃一酒榼中有美醞眾共飲之皆曰麴生
風味不可忘也故後人相傳以酒云

濁酒一杯

晉嵇康嘗云今欲守陋巷教養子孫時與親故敘離
闊陳說平生濁酒一杯彈琴一曲則吾之志意畢矣
故杜公詩濁醪有妙理庶用慰沉浮卽此意也

忍斷杯中物

晉吳術好飲因醉詬權貴遂戒飲阮宣一日命術飲術辭以斷飲宣以拳毆其背曰看看老逼癡漢忍斷杯中物耶抑而飲之故杜公有忍斷杯中物之句全用此也

中山千日酒

中山有千日酒飲之輒昏醉博物志載劉玄石飲千日酒歸醉不醒其家以醉死葬之與同飲者聞之往諭焉至期開冢果醒故范傳正作李白墓銘云至今尙疑其醉在千日蓋此事耳

鬲上臍下

桓温有主簿善别酒好者目爲青州從事惡者爲平原督郵蓋青州有齊部而平原有革縣人言酒美則直止臍下酒惡止於鬲上住故從事謂到臍下督郵謂到鬲上皆借言之故東坡謝人惠酒有青州老從事鬲上非所部又人以雙樽相惠及開一樽無有有詩云不謂青州兩從事化爲烏有一先生皆用此也
典衣償酒債

吳孫權之叔濟嗜酒不治產業嘗醉欠人酒緡人皆

笑之濟怡然自若謂曰尋常行坐處欠人酒債欲貨
此緼袍以償之耳故古詩云典盡春衣無可奈尋常
行處欠人錢杜公亦有酒債尋常行處有之句秦少
游亦有詩云日典春衣非爲酒家貧食粥已多時皆
此事也

一飲一石

晉劉伶嘗求酒於妻妻捐酒毀器諫曰君酒太過非
攝生之道宜斷之伶曰善不能自禁唯當具酒食祝
鬼神自誓乃可妻從之伶跪祝曰天生劉伶以酒爲

名一飲一石五斗解醒婦人之言慎不可聽仍引酒
食肉頽然復醉

玉山頽

晉嵇康飲酒醉倒如玉山之將頽故唐劉禹錫詩云
寂寂獨看金燼落紛紛只見玉山頽自知不是高陽
侶一夜星星騎馬迴而東坡飲傅國博家詩云不肯
星星騎馬迴玉人知爲玉山頽蓋用此也

願爲十日飲

史記秦昭王遺趙平原君書曰寡人聞君之高義願

與君爲布衣交幸過我寡人當與君爲十日之飲故
坡詩有樂哉十日飲之句

騎馬如乘船

晉阮咸醉騎馬欹傾時人指而笑曰箇老子騎馬如
乘船行波浪中故杜公飲中八仙歌云知章騎馬似
乘船蓋本此也

枕麴藉糟

晉劉伶酒德頌有云先生於是方捧罌承槽銜盃漱
醪奮髯箕踞枕麴藉糟故東坡題醉眠枕云枕麴先

生猶笑汝枉將空腹貯遺編是也

浮以大白

說苑魏文侯與大夫飲使公乘不仁爲觴政曰飲不盡者浮以大白文侯飲不盡不仁舉白以浮君故東坡贈莘老詩云若對青山談世事當須舉白便浮君是也卽今之罰酒耳

耽酒無錢

唐盧仝自號玉川子詩云天下薄夫苦耽酒玉川先生也耽酒薄夫有錢恣暢樂先生無錢養淡薄有錢

無錢俱可憐百年驟過如流川東坡尋春詩云玉川先生真可憐一生耽酒終無錢病過春光九十日獨抱添丁看花發是也

酒兵

南史江諮嘗言酒猶兵也兵可千日不用不可一日不備酒可千日不飲不可一飲不醉故後人遂以酒爲兵東坡有破恨懸知酒有兵之句

送客留髡

史記齊威王置酒後宮召淳于髡賜之酒問曰先生

能飲幾何而醉對曰臣飲一斗亦醉一石亦醉王曰
先生飲一斗而醉安能飲一石哉髡曰賜酒大王之
前執法在旁御史在後髡恐懼俯伏而飲不過一斗
徑醉若乃履舄交錯杯盤狼藉堂上燭滅主人留髡
而送客當此之時髡心最懽能飲一石故坡詩云縱
使先生能一石主人未肯獨留髡

酒中聖賢

魏志徐邈爲尚書郎時禁酒而邈私醉從事趙逢問
以曹事邈曰中聖人逢白之太祖太祖怒鮮于輔因

進曰平日醉客謂酒清者爲聖人濁者爲賢人邈性
修謹偶醉狂言爾竟亦坐免至文帝時爲中郎將所
在稱職帝因問曰頗復中聖人否對曰昔子反斃御
叔罰臣嗜同二子而不能自懲時復中之然宿瘤以
醜見傳臣以醉見識帝笑曰名不虛立遂遷撫軍帥
杜公詩云坐對賢人酒東坡詩云時復中之徐邈聖
又云徐邈狂言孟德疑

詩酒仙

白樂天吳郡詩石記云貞元中韋應物爲蘇州牧房

孺復爲杭州牧韋嗜詩房嗜酒吳中目爲詩酒仙

金貂換酒

晉阮孚字遙集遷黃門侍郎散騎常侍嘗以金貂換酒爲所司彈劾帝宥之故杜公有金魚換酒來之句李太白亦有詩云不怕道狂揮玉爵亦曾乘興換金貂又云欲將朱匣青銅鏡換取金尊白玉卮鏡裏老來無避處尊前愁至有消時倣此事也

杖頭錢

晉阮修字宣子性簡任不修人事常步行以百錢挂

杖頭至酒店便獨酣暢雖當世富貴而不肯顧家無
儋石之儲晏如也故後人有幸有金貂堪換酒不須
宣子杖頭錢之句

黃雞白日

唐白樂天爲蘇杭守日嘗作醉歌云歌罷胡琴掩秦
瑟玲瓏再拜歌應畢誰道使君不解歌聽唱黃雞與
白日黃雞催曉丑時鳴白日催年酉時沒腰間紅綬
挂未穩鏡裏紅顏看已失玲瓏玲瓏老奈何使君歌
了汝更歌故東坡和蘇伯固九日詩云只有黃雞與

白日玲瓏應識使君歌此也

盜飲

晉畢卓少放達爲吏部郎常飲酒廢職比舍郎釀熟卓因醉夜至其甕間盜飲爲掌酒者所縛明日視之乃畢吏部也遽釋其縛卓遂引主人宴於甕側致醉而去故東坡謝人惠酒詩有畢卓盜竊劉伶顛之句此也

盃酌餘瀝

晉書陸納謂桓温曰明公近云飲酒三升納止可二

升今有一斗以備盃酌餘瀝故坡詩有帝觴分餘瀝
之句用此也

瑞露甘香

纂異記載田嚠鄧韶忽逢二書生謂曰我有瑞露之
酒釀於百花之中與田鄧飲其味甘香故東坡地黃
詩借此云嚠作瑞露珍又食荔枝詩云瑞露酌天漿

詩律武庫後集卷二

宋呂祖謙撰

郡後學胡鳳丹月樵校梓

酒飲門

杯中弩影

風俗通云汲縣令應郴以夏至日請主簿杜宣飲北
壁上有懸赤弩照於杯中如蛇宣惡之及飲得疾郴
知之復延宣飲於舊處其見如初因指謂曰此但弩
影耳宣疾遂愈故杜詩有疑惑樽中弩之句此事與
藥廣蛇影大相類但弓與弩異耳

步兵校尉

晉阮籍本有濟世之心屬魏晉多故之際名士少有
全者由是不與世事遂酣飲爲常聞步兵廚人善釀
有貯酒三百斛者乃求爲步兵校尉世號阮步兵故
坡詩有步兵飲酒中散琴之句嵇康爲中散大夫著
琴賦以彈琴詠詩自足於懷與籍善時號嵇阮故云

黃公酒壚

晉王戎字濬沖爲尙書令著公服乘輅經黃公酒壚
下過顧謂後車客曰吾昔與嵇叔夜阮嗣宗暢酣於

此竹林之遊亦預其末自嵇阮之亡吾便爲時所羈
繼今日視之雖近邈若山河故坡寄王宣義詩云不
學山王乘駟馬回頭空指黃公壚是也竹林七賢後
獨山濤王戎仕宦顯達故云

無事飲

史記陳軫嘗謂犀首曰公何好飲答曰無事也故坡
詩云犀首正緣無事飲是也

醉鄉侯

唐人詩云若使劉伶爲酒帝亦須封我醉鄉侯皮日

休詩亦云他年謁帝言何事請贈劉伶作醉侯故後人常用其語

三爵

魏文帝典論言劉荆州表貴驕好酒自爲三爵大曰伯雅受七升次曰仲雅受五升又次曰季雅受三升故後人詩云勸君伯雅十分酒是也

醇酎九醞

西京雜記漢制宗廟八月飲酎以正月旦作至八月成名曰酎一曰九醞一曰醇酎謝惠連雪賦有酌湘

吳之醇酎而杜公詩亦有性亦嗜醇酎之句

堯飲千鍾

孔叢子曰平原君與子高飲強子高酒曰昔有遺諺
堯飲千鍾孔子百觚子路嗑嗑古之賢聖無不能飲
子何辭焉

以驅俗態

昔王子晉有弟子號太陽好酒常醉人或問之對曰
晚學俗態未除故藉酒以自驅耳

拍浮酒船

晉畢卓嘗謂人曰得酒滿數百斛船四時甘果美味
置兩頭左手持酒盃右手持蟹螯拍浮酒船中便足
了一生矣故東坡有詩云萬斛船中著美酒與君一
生長拍浮是也

桑落河酒

世說桑落河多美酒晉宣帝時羌人來獻帝以九日
賜百寮飲故庾信嘗從蒲州使君乞酒詩云蒲城桑
落酒灞岸菊花天而杜詩亦云坐聞桑落酒來把菊
花枝皆用此也

淵明攢眉

廬阜記遠公法師結白蓮淨土之社謂淵明趣尚高邁以書召之淵明曰弟子性嗜酒法師若許飲卽往矣遠許之遂造焉遠因勉入社淵明攢眉而去時謝靈運求入社而師以其心雜止之時人有淵明挽不留靈運推不去之語

惡客

唐元結謂不飲者爲惡客故東坡在黃州而陳季常時復遠來相訪故寄詩云三年已四至歲歲逢惡客

黃山谷招客解醒絕句云破卯扶頭酒一盃燈前風味喚仍回高陽社裏如相訪不用閑攜惡客來言不飲者不必至又後人以痛飲爲惡客

曰飲毋何

漢袁盎字絲爲吳相其兄子種謂盎曰吳王驕日久今苟欲劾治之彼不上書告君則利劔刺君矣惟能曰飲毋何說王無反如此則幸脫無事矣盎納其言故坡詩有曰飲毋何足袁盎之句

倒著接羅

世說白接離衫也一云白帽也晉山簡字季倫爲襄陽守嘗醉習家高陽池襄陽小兒歌曰山公出何許往造高陽池日暮倒載歸酩酊無所知時時能騎馬倒著白接離舉鞭問葛強何如并州兒而李太白作襄陽歌云落日欲沒峴山西倒著接離花下迷襄陽小兒齊拍手攔街爭唱白銅鞮旁人借問笑何事笑殺山公醉似泥故東坡同李公擇飲傅國博家詩有兒童拍手鬧黃昏應笑山公醉習園借用也

酒客法士

楊雄作酒箴以諷成帝其文以酒客難法度之士云
譬之於物子猶餅矣觀餅之居居井之湄處高臨深
動常近危陳遵見之大喜謂張竦曰吾與爾猶是也
足下諷誦經書苦心自約不敢差跌而我放意自恣
浮沉俗閒官爵功名不減於子而差樂顧不優耶竦
曰子欲爲我亦不能吾而效子亦敗矣故坡和孔常
父戲飲詩云楊雄他文不皆奇獨稱觀餅居井湄酒
客法士兩小兒陳遵張竦曾何知全用此事也

公在壑谷

左傳鄭伯有嗜酒爲窟室而夜飲朝至未已朝者曰
公焉在其人曰吾公在壑谷故坡夜飲詩云月未上
時應早散免教壑谷問吾公是也

藍尾

太平廣記虎部申屠龍曰婪尾酒最後飲也元日飲
酒自少至長蓋祝壽之意年最高者飲藍尾杯眾勸
三杯喜其壽之高也藍尾猶吳越人稱臨尾蓋鄉語
也白樂天詩備矣樂天元日贈夢得云與君同甲子
歲酒合誰先而劉禹錫元日樂天見過因舉酒爲賀

云與君同甲子壽酒讓先杯而樂天又有歲假內命
酒贈周判蕭協律云共知欲老流年急且喜新正假
日頻聞健此時相勸醉偷閑何處共尋春腳隨周叟
行猶疾頭比蕭翁白未勻歲酒先拈辭不得被君推
作少年人又歲日家宴戲示弟姪云歲盞後推藍尾
酒春盤先勸膠去聲牙錫又元日對酒三杯藍尾酒
一櫟膠牙錫除卻崔常侍無人與我爭又喜入新年
老過占他藍尾酒病餘收得到頭身

漉巾

晉陶潛嗜酒郡將常候之值其釀熟取頭上葛巾漉
畢還復著之後人有寄言彭澤令何必漉烏巾之句
蓋以此也

獨酌

唐馬周入關西舍新豐逆旅命酒一斗八升悠然獨
酌又李白月下獨酌云花下一壺酒獨酌無相親舉
杯邀明月對影成三人月既不解飲影徒隨我身我
歌月徘徊我舞影凌亂醒時同交歡醉後各分散永
結無情遊相期綠岳畔

醉面

馬子才浩齋歌請君醉我一斗酒紅光入面春風和
故後人有醉面覺陽春之句杜詩亦云顏衰酒借紅
一意也

酒家仙

杜子美飲中八仙歌李白一斗詩百篇長安市上酒
家眠天子呼來不上船自稱臣是酒中仙故後人有
自作酒中仙之句

詩律武庫後集卷三

宋呂祖謙撰

郡後學胡鳳丹月樵校梓

儉約門

爛蒸瓠壺

唐盧懷慎爲相清儉召客食曰爛蒸去毛莫拘折項
客疑其鵝鴨也已而下粟米飯一盂蒸葫蘆一枚而
已坡詩爛蒸鵝鴨乃瓠壺又蜀志張府君裔如瓠壺
外雖澤而中實麤耳

拙於生事

唐顏真卿爲刑部尙書時乞米於李大夫帖云拙於生事家食粥來已數月今又罄乏實用憂煎故坡詩顏公食粥敢言炊又秦少游云家貧食粥已多時用此事也

數米而炊

莊周言簡髮而櫛數米而炊切切乎又何足以濟世哉故坡詩有陋邦貧且病數米銖稱炭之句又漢末天下兵荒米斗直十餘緡京房持一衾於長安中換塵米一斗故杜公秋雨嘆云城中斗米換衾裯相許

寧論兩相直

得米如珠

說苑墨子謂骨釐曰今凶荒有欲與子以隨侯之珠
又願與子以一鍾之粟者得粟不得珠得珠不得粟
子將何擇焉故坡詩有得米如得珠之句

家具少於車

歐陽公詩話云孟郊賈島皆以詩窮至死而平生尤
喜爲窮苦之句孟有移居詩云借車載家具家具少
於車由是觀之乃知都無一物爾故坡詩云君不見

詩人載車無可載蓋此也

一錢看囊

晉阮孚山野自放嗜酒日挑一皂囊遊會稽客問囊中何物孚曰俱無物但一錢看囊庶免羞澁爾故村子美詩云囊空恐羞澁留得一錢看

方冬猶葛衣

隋袁充少時父黨過門見充方冬尙葛衣因戲之曰絺兮綌兮淒其以風充曰爲絺爲綌服之無斃故杜詩云北里富熏天高枕夜吹笛焉知南鄰翁九月猶

絺綌是也

腰垂破銀章

隋張嵩清儉守節爲巴西令官滿駕柴車載書數百
卷腰垂破銀章辭邑人而去邑人惜其去懇留於文
帝遂遷爲巴西太守杜詩有素髮乾垂領銀章破在
腰之句

坐以破馬韉

戰國策蘇秦少與張儀善秦旣在趙爲相儀至趙使
人白秦秦惡其來必欲激怒使去之故令儀於城東

門外坐以破馬韉進以糲食儀憤乃西入秦昭王喜之拜爲相儀歎曰馬韉之士乃至是乎老杜詩云人來坐馬韉言貧無坐席也

牆頭度酒

晉陶侃少時家貧有友人見訪無以致誠其鄰人頗賢謂侃曰子門有長者軒車何不延之以論當世事侃曰貧不能備酒醴鄰人密於牆頭度以濁酒隻雞遂成終日之樂本朝王冀公欽若過其廟題詩云九重天闕夢掉臂黃雞白酒鄰舍恩而杜公夏日李公

見訪詩云借問有酒否牆頭過濁醪皆用此事也

庾郎食韭

南史庾杲之清貧自鄴食惟有韭菹瀹韭生韭雜菜
任昉常戲之曰誰謂庾郎貧食鮭常有二十七種菜
蓋戲言其有三韭也故坡詩有筒中錢盡案無鮭之
句是也

清畏人知

晉胡質有清德武帝問其子威曰卿清何如父清威
曰臣父清畏人知臣清畏人不知故東坡有丈人清

德畏人知之句

貧猶有一劍

史記馮驩躡屩見孟嘗君君置傳舍中十餘日君問
傳舍長曰客何所爲曰馮先生甚貧猶有一劍故後
人有先生有劍未爲貧之句

名譽門

大小馮君

前漢馮奉世有五子曰譚曰野王曰逡曰立曰參皆
有名譽而野王與立相代上郡太守吏民歌之曰大

馮君小馮君兄弟繼踵相因循聰明慈愛惠民政
如魯衛德化均周公康叔猶二君故坡詩有今年太
守尤難繼慈愛聰明惠利人之句

康成書帶

三齊記鄭司農常居不其城南山教授所居山下草
如薤葉長尺餘時人名爲康成書帶故坡書軒詩云
庭下已生書帶草使君疑是鄭康成是也

玉人

晉衛玠字叔寶風神秀異每乘羊車入市見者皆以

爲玉人玠舅王濟俊爽有風姿每見玠輒嘆曰珠玉
在側覺我形穢又曰與之同遊寔若明珠之在側朗
然照人又裴楷字叔則風神高邁容儀俊爽時謂之
玉人又曰一見裴叔則如近玉山相照映也故後人
有敢近玉人遊之句

紫髯將軍

孫權爲張遼所敗遼問降人曰向有紫髯將軍爲誰
答曰孫會稽也故坡有受降城下紫髯郎之句

峴山

晉羊祜叔子鎮襄陽嘗登峴山慨然嘆息顧謂從事
鄒湛曰自有宇宙便有此山由來賢達勝士登此遠
望如我與卿者多矣今皆湮沒無聞使人悲傷湛對
曰公德冠四海道嗣前哲令聞令望與此山俱傳至
如湛輩當如公言耳故坡登峴山亭詩云我非羊叔
子愧此峴山亭是也

濯濯如春柳

晉王恭美姿儀人多慕悅或目云如濯濯春月柳也
又嘗於雪中披鶴氅而行孟昶見之曰真神仙中人

也故東坡詩云更著綸巾披鶴氅他年應作畫圖誇
昔諸葛亮羽扇綸巾指麾三軍

束之高閣

晉庾翼傳京兆杜乂陳郡殷浩並才名冠世翼弗之
重每語人曰此輩宜束之高閣俟天下太平然後議
其任耳故韓退之借其言作詩云春秋三傳束高閣
獨抱遺經究始終

人門兼美

陳書高宗謂蔡凝曰我欲用義興主壻錢肅爲黃門

郎卿意如何凝曰黃散之職故須人門兼美又唐史
李揆肅宗謂曰卿門地人物文學皆爲當世第一故
東坡送歐公之子叔弼詩云清朝固多士人門子皆
冠是也

皮裏陽秋

晉褚裒字季野名冠中朝桓彝曰季野有皮裏陽秋
言外無藏否而內有褒貶也謝安亦云裒雖不言而
四時之氣亦備

韋趙杞梓

唐韋承慶兄弟與趙冬曦兄弟俱有盛名張說曰韋趙兄弟人之杞梓也

東南之美

漢虞翻與孔融書并示以所著易注融答書云聞延陵之觀樂觀吾子之治易乃知東南之美非徒會稽之竹箭也

東南之美出爾雅

墓題征西

魏太祖曹操初為典軍校尉意欲為國家討賊立功封侯作征西將軍使異時題其墓道曰漢故征西將

軍曹侯之墓乃吾志也故坡和荆公太一宮壁詩云
但有樽中若下何須墓上征西

若下酒名

戶外之屨

列子之齊中道而反遇伯昏瞀人曰奚方而反曰吾
驚焉吾嘗食於十漿而五漿先饋吾是以驚伯昏瞀
人曰善哉觀乎汝處己人將保汝矣無幾何而戶外
之屨滿矣

水鏡

晉衛伯玉命子弟造樂廣曰此人之水鏡見之瑩然

若披雲霧而覩青天也

鶴在雞羣

晉嵇紹中散大夫康之子也紹始入洛或謂王戎曰
昨見紹於稠人中昂昂如野鶴之在雞羣戎曰君復
未見其父耳

角立傑出

漢陳蕃稱徐孺子生於江南卑薄之地而能角立傑
出也

詩律武庫後集卷四

宋呂祖謙撰

郡後學胡鳳丹月樵校梓

才能門

痛飲讀離騷

世說王孝伯云名士不必須奇才但使常得無事痛
飲讀離騷經便可爲名士耳故後人有詩云誰能無
事讀離騷此也

瑤林瓊樹

晉王戎有人倫鑒識常目王衍如瑤林瓊樹自然是

風塵表物故坡詩有故人年少真瓊樹之句

望郎

唐李義山酬令狐郎中詩有望郎臨古郡佳句灑丹青之句而東坡用以送周正孺得梓州云東川得望郎本此也

去天尺五

京兆城南有韋曲杜曲皆世遭盛時衣冠煒燁時人語曰城南韋杜去天尺五言長安帝都相近也故杜牧詩云家在城南韋杜旁即此耳

屈公望此府

唐皇甫公義檢校沛王府長史引韋思謙爲同府倉曹謂韋曰公豈此池中之物屈公爲數旬客以望此府爾故東坡送人詩云留君望此府助我憐其衰正此事耳

行祕書

唐國朝雜錄云唐太宗出幸有司請載書以從帝曰不須虞世南在此行祕書也故東坡題萬卷堂云君家四壁如相如卷藏天祿吞石渠豈惟鄴侯三萬軸

家有世南行祕書是也

魏公畫籌

晉魏舒爲鍾毓長史毓每與參佐射舒但爲畫籌而已後遇朋儔不足乃以舒滿數毓初不知其善射及是舒容範閑雅張弓挾矢發無不中舉坐皆驚莫有敵者毓愧嘆曰吾之不足以知卿才有如此射矣故東坡不知歐叔弼能詩及臨發出一篇有淵明風製因作詩送行云平生魏公籌忽斲郢人墁蓋此事也

樗櫟散材

莊子匠石之齊至於曲轅見櫟社樹其大蔽牛匠石不顧曰散木也故老杜詩云鄭公樗散鬢成絲而東坡云懶惰便樗散踈狂托聖明亦是也

技癢欲言

應劭風俗通云太史公記高漸離變名姓爲人庸保匿作於宋氏久之作苦聞其家堂上有客擊筑技癢不能無出言蓋懷其技而癢也故潘岳賦云徒心煩而技癢者此也

識鑒門

名四
三
藏板
卿家癡叔

晉王湛少言語初有隱德人莫能知兄弟宗族皆以爲癡兄子濟尤輕之无子姪之敬武帝亦常調濟曰卿家癡叔死未濟无以答一日詣湛見牀頭有周易問曰叔父何用此爲湛曰體中不佳時復看耳濟請言之因剖析立理皆所未聞武帝復如前問濟曰臣叔殊不癡因稱其美又濟有馬難乘湛因騎之姿容既妙回策如縈雖善騎者无以過也湛曰此馬雖良不堪苦行近見督郵馬勝此但芻秣不至耳濟試養

之與已馬等湛又曰此馬任重方知之平路无以別也於是於蟻封內試之濟馬果躡而督郵馬如常濟始驚異謂其父曰濟得一叔耳故東坡和王晉卿畫馬詩云督郵有良馬不爲君所知一朝見縈策蟻封驚肉飛豈惟馬不遇人已半生癡是也肉飛見中山靖王曰羽翮肉飛故此有云

其類似堯

家語孔子適鄭與弟子相失孔子獨立於鄭之東門鄭人或謂子貢曰東門有人其類類堯其項類臯陶

其肩似子產然自腰以下不及禹三寸纍纍若喪家
之狗子貢以告孔子欣然曰形狀未也而似喪家狗
然哉然哉故東坡從駕景靈宮詩有共驚堯顙類高
辛之句蓋借用也

平生馬少遊

漢馬援嘗謂官屬曰吾從弟少遊嘗哀吾慷慨多大
志曰士生一世但取衣食裁足乘下澤車馭款段馬
爲郡縣吏守墳墓鄉里稱善人足矣何必復求盈餘
但自苦耳吾當虜未滅上霧下潦毒氣薰蒸因念少

遊平生時語何可得也今賴士大夫之力蒙被大恩
猥先諸君紆佩金紫且喜且慙坡詩有念歸意云雪
堂亦有思歸曲爲謝平生馬少遊蓋取子由之言也
不如一縫掖

後漢王符隱居著書三十篇以譏當世得失號曰潛
夫論時皇甫規解官歸安定人有以貨得雁門守者
亦去官還家書刺謁規臥不迎旣入而問卿在雁
門食雁美乎頃又報云王符在門規素聞其名乃遽
起衣不及帶屣履迎門援符手而還與同坐極歡時

人語曰徒見二千石不如一縫掖言書生道藝之貴也故坡詩有云歸來問雁吾何敢疾世王符解著書是也

目擊道存

莊子田子方篇仲尼見溫伯雪子而不言仲尼曰若夫人者目擊而道存矣不可以容聲矣故杜詩有懷新目似擊接要心已領之句是也

半面之雅

後漢應奉曾見造車匠於門閒半面他日於路逢而

識之故後人以曾見者爲半面之雅

銅駝荆棘中

晉索靖有先識遠見知天下將亂指洛陽宮門銅駝
嘆曰會見汝在荆棘中矣未幾晉惠帝之末天下大
亂故坡詩有豈信荆棘埋銅駝之句

弊箒千金

魏文帝論文曰夫人喜於自見而文非一體鮮能備
善是以各以所長相輕所短里語曰家有弊箒享以
千金斯不自見之患也故坡詩云千金弊箒那堪換

此也

相去九牛毛

有人或謂華譚曰諺言人之相去如九牛毛寧有是理乎譚曰昔者許由巢父讓天子之貴市道小人爭半錢之利此之相去奚啻九牛毛故坡題趙清獻公高齋云乃知賢達與愚陋豈直相去九牛毛蓋以此也

掩口盧胡

盧胡笑也漢應劭云昔鄭人以乾鼠為璞宋愚夫亦

寶燕石緹縉十重夫觀之者掩口盧胡而笑坡詩滿
堂坐客皆盧胡

烹瓠葉

後漢劉昆教授弟子常五百餘人每春秋享射常備
列儀典以瓠葉爲俎豆原昆意蓋取小雅瓠葉詩曰
幡幡瓠葉采之烹之之意故坡有厭伴老儒烹瓠葉
強隨舉子踏槐花之句

阿奴碌碌

晉周顛伯仁之母李氏字絡秀當中興時顛嵩謨兄

弟並列顯位嘗冬至日李舉觴賜三子曰吾渡江托
 足無所不謂汝等並貴列吾目前復何所憂嵩起曰
 恐不如尊旨伯仁志大而才短各重而識暗好乘人
 之弊此非自全之道而嵩性抗直亦不容於世唯阿
 奴謨小字碌碌當在母目下後皆如其言故坡寄弟
 子由詩有云阿奴須碌碌門戶要全生以此也

造物拘拘

莊子子輿有病子祀往問之曰偉哉夫造物者將以
 予爲此拘拘也曲僂發背上有五管頤隱於臍肩高

於頂躄躄而鑿井曰嗟乎天又將以予爲此拘拘也
故坡維摩像詩云昔者子輿病且死其友子祀往問
之躄躄鑿井自嘆息造物將奚以我爲蓋以此也

通德擁髻

漢伶立字子干買妾樊通德有才色能言趙飛燕姊
妹故事子干閑居命言之亶亶不倦子干謂通德曰
斯人俱灰滅矣當時疲精殆力馳騫嗜慾蠱惑之事
寧知終歸荒田野草乎通德卷袖顧視燭影以手擁
髻淒然泣下不勝其悲坡贈朝雲詩有恰如通德伴

伶玄之句又和王定國詩擁髻无言夜語清之句以
定國有美妾故也

絳帕蒙頭

吳孫策字伯符江表傳曰策欲誅道士于吉諸將勸
之策曰昔南陽張津爲交州刺史捨前聖典籍廢漢
家法律嘗著絳帕頭鼓琴燒香讀邪俗道書云以助
化卒爲南夷所殺此輩甚無益諸君但未悟耳故坡
謫儋耳詩云從今免被孫郎笑絳帕蒙頭讀道書是
也

詩律武庫後集卷五

宋呂祖謙撰

郡後學胡鳳丹月樵校梓

識鑿門

白屋非久留

漢賈復見耿弇曰子非久留白屋之士風雲會合當
平步天衢耳後果如其言故杜公詩有白屋難久留
之句此也

軒冕儻來

莊子繕性篇古之所謂得志者非軒冕之謂也軒冕

在身非性命也物之儻來寄也其來不可圉其去不可止故不爲軒冕肆志坡詩云古來軒冕徒操捨兩悲慄蓋傷之也

臧穀均亡羊

莊子駢拇篇言臧穀二人相與牧羊而俱亡其羊蓋臧則挾策讀書穀則博塞以遊二人者事業不同其於亡羊均故東坡和人詠史詩云仲尼憂世接輿狂臧穀雖殊竟兩亡是也

何詎不爲福

淮南子北叟失馬人皆弔之叟曰何詎不爲福居數
月其馬將駿馬而歸人皆賀之叟曰何詎不爲禍家
富馬良其子好騎墮而折髀人皆弔之叟曰何詎不
爲福居數年胡夷大入丁壯皆控弦而戰塞上之人
死者十九此獨以跛之故而父子相保故杜詩云垂
白辭南翁委身希北叟卽此事也

折衝樽俎

家語晉平公欲伐齊使范昭往觀其政齊景公觴之
昭請公弃酌晏子知之令徹樽而更之昭歸謂平公

曰齊不可伐吾欲慙其君晏子已知之孔子聞之曰
不出樽俎之間折衝千里之外晏子之謂也故後人
有談笑勝千里之句是也

鹽車遭伯樂

戰國策曰汗明見春申君曰夫驥之齒長矣服鹽車
而上太行漉汁洒地白汗交流外坂遷延負棘不能
上伯樂遭之下車攀而哭之解紵衣而幕之驥於是
乎俛而噴仰而鳴蓋見伯樂之知己也故杜公天育
騾騎歌云如今豈無騾與驘時無王良伯樂死

卽休

作駒已權奇

前漢禮樂志郊祀歌云太乙況天馬下霑赤汗沫流
赭志倜儻精權奇故坡贈孔文仲詩云君如汗血馬
作駒已權奇又李白天馬歌云權奇去滅沒

溝中枯木

莊子云百年之木破而爲犧樽青黃而文之其斷在
溝中者比夫犧樽則美惡有間矣故坡詩云溝中枯
木應笑人鑽灼不然誰似我

恩德門 陰德附

直指一困

吳魯肅字子敬家富於財嘗散以賑窮乏結豪士得鄉邑之心時廬江周瑜爲居巢長聞之往求濟於肅時肅有米二困各千斛直指一困與瑜瑜益奇之乃與結交焉故杜公有贈粟困應指之句東坡謝惠州詹守詩有欲乞公瑾一倉粟試滿莊生五石樽之句

祭竈請比鄰

後漢孫室爲張忠主簿入舍乃祭竈請比鄰故坡在

海南有詩云北船不到米如珠醉飽蕭條半月餘
明日東家知祀竈隻雞斗酒定膳吾借此用也

痿人念起

前漢韓王信報柴將軍書曰僕之思歸如痿人

反人佳人

之不忘起盲者之不忘視師古注曰痿者風痺病也
故孫公尺牘云區區願見之心如痿人之念起也是
也

分我餘光

史記甘茂謂蘇秦曰貧人女與富人女會績貧女曰

我無以買燭而子之燭光幸有餘子可分我餘光無損子明而得一便焉故坡詩有餘光幸分我之句是也

贖老馬

韓詩外傳田子方出見老馬於野喟然問於御者對曰故公家畜也疲老不爲用故放之子方曰少盡其力而老棄其身仁者不爲也東帛贖之士聞之皆歸心焉故杜詩有主人憐老馬之句

雞犬識新豐

西京雜記高帝既作新豐并移舊社衢巷棟宇物色
惟舊男女老幼相攜路者各知其室放犬羊雞鴨於
通衢亦競識其家故坡謫居惠州有彷彿曾遊豈夢
中欣然雞犬識新豐之句用此事也

助給薪水

陶淵明送一力給其子曰汝旦夕之費自給爲難今
遣此力助爾薪水之勞此亦人子也可善遇之故坡
寄賀水部詩有願供薪水看燒丹之句

陰德畏人知

北史李士謙字子約爲開府參軍家富於財每以振
施爲務郡人德之撫其子孫曰此李參軍遺惠也或
謂士謙曰子多陰德士謙曰夫言陰德其猶耳鳴已
獨知之人無知者今吾所作吾子皆知何陰德之有
李白詩撝謙驚主寵陰德畏人知此也

治獄多陰德

前漢于定國父于公爲縣史郡決曹決獄平罹文法
者于公所決皆不恨郡中爲之立生祠號曰于公祠
于公門閭壞父老方共治之于公謂曰少高大門閭

令容駟馬高蓋車我治獄多陰德未嘗有所冤子孫
必有興者至定國爲丞相永爲御史大夫封侯傳世
故劉禹錫寄白樂天云于公必有高門慶是也

案法平允

虞詡字升卿祖父經爲郡縣獄吏案法平允務存寬
恕每冬月上其狀常流涕隨之嘗稱曰東海于公高
爲里門而其子定國卒至丞相吾決獄六十年矣雖
不及于公其庶幾乎子孫何必不爲九卿耶故字詡
曰升卿詡後爲尙書令故邦俊題王司理持平堂云

卷五
六
藏板
淑問臯陶晞在泮奉公不撓幕中參仰思彌教刑明
五深念求情法以三虞詡爲卿宜有自于公比德蓋
無慙園空草茂庭柯綠行詠甘棠踵召南是也

陰施陽報

賈誼新書曰孫叔敖爲兒出遊而還憂而不食母問
其故泣而對曰今日兒見兩頭蛇恐去死無日矣母
曰今蛇安在曰吾恐他人又見已埋之矣母曰吾聞
有陰德者天報以福德勝不祥仁除百禍天處高而
聽卑汝不死矣後爲楚令尹故周曇詠史云童穉逢

蛇野道傍慮妨來者爲埋藏是知陽報由陰施天爵
昭然契自章

書畫門

咄咄逼人

晉王羲之字逸少學書於衛夫人夫人曰有一弟子
咄咄逼人故羲之自言吾書比鍾繇當抗衡比張芝
當雁行故坡詩有咄咄真相逼諸生敢雁行之句以
此也

臨池盡墨

唐張旭字伯美吳郡人官至右率府長史善草書遇醉輒揮筆大叫以頭濡墨而書醒後自視以爲神凡家之絹素必先書而後練臨池學書池水盡墨故時人目爲張顛草聖嘗自謂吾始見公主擔夫爭道而得其法後觀公孫氏舞劍而得其神故杜公詩云連山蟠其間溟渤與筆力有練實先書臨池真盡墨是也

厭家雞愛野鶩

晉庾翼能書與右軍齊名而右軍後進翼心不服在

荊州與都下人書云小兒輩皆學王書所謂厭家雞
愛野鶩出王僧虔傳

春蚓秋蛇

王羲之傳言蕭子雲近出擅名江表僅得成書無丈
夫之氣行行若縈春蚓字字若縮秋蛇臥王濛於紙
中坐徐偃於筆下以茲播美非濫名耶故坡草書詩
有春蚓秋蛇病子雲之句

柳家元和腳

唐柳公權在元和閒書最有名而劉禹錫酬柳宗元

詩云柳家新樣元和腳且盡薑芽斂手從故坡贈柳
氏二外生求筆蹟詩云君家自有元和腳莫厭家雞
更問人可謂故語